

auri vi pretiosissimarumque rerum copia onustus, pervenit; quibus Regis animum, nedum purpuratorum omnium adeo flexit ac delinivit, ut statim summum auctoritatis locum nancisceretur; a Rege adcersitus, de rebus gravissimis consuleret, ipsumque adeo in suam sententiam pertraheret, ut penes illum summa auctoritas ac prope totius imperii administratio esse videretur. At Sophi legatus ingenti cum pompa urbem ingressus, cum de pace egisset, summo calidæ gentis artificio persuasus, sericum, nondum concordia firmata, Achomati tradidit; ac mox, Turca uno comitante, in Persidem reversus, cum mandata egressum Sophus animadverteret, carceri addixit; Turcæ erui oculos, nares auresque præcidi iussit; exinde denuo ad arma ventum est. Verumtamen mense februario, vigente hieme (quod perraro accidit) Achomates cum maximis copiis, quas ad centum ac quinquaginta millia esse ferebatur, una cum Nasupho Byzantio egressus, Adrianopolim petiit. Venatum Regem animi causa profectum Turcæ vulgaverant: at exercitum viribus ac numero præpotentem, com meatu, apparatu instructum, non sine expeditionis alicujus opinione eo anni tempore Byzantio eductum, credibile videbatur. Itaque quonam Achomatis consilia tenderent, cum magna animorum suspensione Principes circumspectabant. Et si vero adversus Dacos arma moturum, indeque in Pannoniam bellum illaturum, nondum pace cum Cæsare firmata, plerique opinarentur; non deerant etiam, qui, terrestribus copiis christianos Principes distingere, classe autem Melitam, vel Siciliam, vel Cretam aggredi statuisse, suspicarentur.

Senatus in ea Achomatis consiliorum ambiguitate, ne quid ad imperium maritimum tutandum prætermitteret, Joannem Jacobum Zannium, Cretæ legatum, quatuor triremibus extra ordinem sex adjicere; Aloysium Justinianum, damnatorum triremibus præfectum, quinquaginta aureorum millia una cum pilarum, tormentarii pulveris, ceteroque bellico apparatu & commeatibus in Cretam deferre iussit. Ad Amphimalum portum arctius tutandum, Marathi, quem vocant, scopulum, communi decretum; negotiumque Zannio legato ac tribus quæsitioribus, Octaviano Bono, Joanni Paschalico, Marco Lauretano commissum, in aliud postea tempus rejectum est. Navalium

1613
Nasuphus
cum Persa-
rum legato
Byzantium
pervenit.

Christiano-
rum Princ.
de Turcarum
armis suspèn-
siones.

Veneri clas-
sem augent

Senatus
Decretum
de Marathi
scopulo mu-
niendo.